

Diskurtso berria egin beharraz

HIZKUNTZA POLITIKA NAFARROAN. Iñaki Azkona, Sagrario Aleman, Aingeru Epaltza eta Mikel Arregik hausnarketa egin behar dela nabarmendu dute Euskalerrira Irratian.



Iñaki Azkona, Sagrario Aleman —biak bizkarra emanda—, Aingeru Epaltza eta Iñaki Azkona, *Euskalerrira Irratiaren* mikrofonoen aurrean, atzo.

ERRANAK

AIINGERU EPALTZA

Ikastolen elkarte

«Euskaldunok ez dugu behar bezain ozenki aldarrikatu gure mezua ez dela bortxatzailea, anitza baizik»

SAGRARIO ALEMAN

IKA

«Euskararen aurkako kanpaina etengabekoa da, ongi planifikatuta, eta orain matrikulazio kanpaina da aitzakia»

MIKEL ARREGI

Oinarriak

«Ezin dugu haien guda zelaian jokatu; Oinarriak kanpainari egin kritikak aintzat hartu behar ditugu»

IÑAKI AZKONA

Iruñeko Udaleko Euskara teknikaria

«Euskgintza eta abertzaletasuna oso lotuak egon dira; horrek ez digu balio izan jende askorengana iristeko»

Alberto Barandiaran | IRUÑEA

Hizkuntza politikak aurtan Nafarroan izan duen atzerakada aitzakia izan zen atzo euskgintzako lau kide *Euskalerrira Irratiaren* mikrofonoen aurrean bildu eta gogoeta egiteko. Lau gonbidatuak bat etorri ziren azpimarratzeko euskgintzak diskurtso berria behar duela Nafarroan eta beste bide batzuk jorratu be-

har direla. «Krisi honek emango digu egokiera diskurtso berriei pentsatzeko», laburbildu zuen Iñaki Azkonak.

Iruñeko Euskara teknikariarekin batera Sagrario Aleman IKako kideak, Aingeru Epaltza Ikastolen Elkarteko presidentek eta Mikel Arregi Oinarriak kideak gaurko egoeraz eta etorkizunaz jardun zuten, Pablo Joxe Aristorena esatariaren galderei erantzunez. Puntua ez

zuten behar izan. Hausnarketarako beharra garbi zegoen denon ahotan.

«Uste genuen aitzina gindoa zela» azaldu zuen Epaltzak, «poliki baina aitzina, baina orain alarma hotsak aditzen ditugu, arriskua ez baita bakarrik geldiaraztea, baina atzera egitea ere». Idazlearen ustetan euskgintzaleek ez dute behar bezain ozenki aldarrikatu mezua ez dela bortxatzailea, eta euskararen mundua anitza dela, «planetak, sateliteak eta konstelazioak dituen». «Hala ere, mezua zabaltzeko bitartekoak behar dira», gaineratu zuen Alemanek, «eta euskaldunok ez dugu boteririk. Beraz, mezua-ren parte baten interpretazioa iristen da, eta manipulatzeko dute».

«Giro politikoak ere izan du eragin handia oraingo egoerara iristeko», aipatu zuen Azkonak, «borroka armatuak izugarritzko kaltea egin diolako gure proiektuari». Aingeruk aipatu zuen alde horretatik oraingo erasoal-

dia ez zitekeela posible izan duela urte eta erdi. «Tregua garaian, eta baita aurrerago ere, beti izan dira erasoaldiak, kanpaina etengabekoa da», erantzun zuen Alemanek.

Lan egiteko moduez ere gogoeta egin zen. «Kontziente izan behar dugu gu garela ahulenak», aipatu zuen Arregik, «eta ezin gara haien guda zelaian borrokatu. Oinarriak kanpainari kritikak aintzat hartu behar ditugu». «Askotan gehiegi tentsionatzen dugu jendea» aipatu zuen Epaltzak, «eta hori egin barik, aktibatu behar genuke», gehitu Alemanek.

Eta aurrera begira? Azkonaren erantzuna: «Euskgintza lotuegia egon da abertzaletasunarekin, eta elebitasunaren mezua geure buruari ere sinesteari behar diogu. Nafarroako egoera zein den kontuan hartu behar dugu». «Etsipenetik salba gaitzakeena da, zerbait berria atera daitekeela giro honetatik» gehitu zuen Epaltzak. Baietz egin zuten gainontzekoek.

DROGA

Tona eta erdi kalamu atzeman ditu Poliziak Miarritzeko ordainlekuan

Erredakzioa | BAIONA

Frantziako Poliziak tona bat eta seiehun kilo kalamu zeramatzan kamioi bat atzeman zuen asteazken ilunabarrean Miarritzeko autobideko ordainlekuan.

Baionako zaintze brigadak geratzeko agindu zion Holandako matrikula zuen kamioi bateko gidariari. Kamioiaren atzeko partean lorategietako hornitze artikuluen artean, egurrezko kutxa batzuetan gordeta zegoen droga, guztira, 1.616,180 kilo. Merkatuan 38 milioi liberako balioa izanen luke kanabisak.

Kamioiko gidaria, Espainian bizi den ingeles nazionalitateko gizonezkoa, atxilotu egin zuten poliziek.

Frantziako Mugetako zuzendaritzaren arabera, urtea hasi zenetik zortzi tona eta erdi kanabis harrrapatu dute Euskal Herrian eta Frantzia eta Espainia arteko beste muga batzuetan.

GERTAKARIAK

Acua taberna inguruko bideo kamerak ari da aztertzen Ertzaintza

Erredakzioa | GASTEIZ

Ertzaintzak lanean jarraitzen du Acua tabernan hilda agertu zen neskaren kasua argitu nahian, eta, nagusiki, bi alde ditu ikerketak: tabernaren inguruetan diren banketxeetako bideo-kameren azterketa eta elkarrizketak auzoko bizilagunekin herenegun goizean zeozer ikusi ote zuten jakiteko.

Hildako neska Ana Agirrezabal da, atzo jakinarazi zuten. Emakumeak «ziztada bat» zuen lepoan, eta, gainera, «indarkeria zantzu nabarmenak», Herrizaingo Sailak jakinarazi zuenez. Gasteizko Udaleko Miguel Angel Etxebarría zinegotziaren arabera, litekeena da neska bortxatua izana.



Kultura Sailak diruz lagundutako egunkaria